



## **REPÚBLICA DEMOCRÁTICA DE TIMOR-LESTE**

### **Intervensaun Enserramentu hosi Primeiru-Ministru iha Debate kona-ba Orsamentu Jerál Estadu ba tinan 2008 - Retifikativu 22 Julhu 2008**

Sua Exselênsia Sr. Prezidente Parlamentu Nasionál

Distintus Deputadus

Distintus Membrus Governu

Senhoras ho Senhores,

Uluk nana'in, ha'u hakarak agradese ba Senhores Deputadus sira nia kontribuisaun boot durante loron tolu ita halo debate, ne'ebé demokrátiku tebes, kona-ba retifikasaun Orsamentu Jerál Estadu tinan 2008 nian.

Orsamentu ne'ebé apresenta ona la'ós "capricho/kaprixiu" ka buat ida ke Governu naran hakarak halo, maibé adaptaun hasoru sirkunstânsias ka situasoens foun – ne'ebé bele dehan di'ak no mós aat – ne'ebé mósu iha tinan ne'e laran. Karik hosi parte ida ita konsege fó resposta ba prioridades prinsipais Paíz nian, hodi kumpri loloos Programa Governu, hosi parte seluk konstranjimentus ka problemas foun mós mósu tán, tanba konjuntura ka situasaun difisil internasionál ne'ebé ameasa estabilidade Timór-Leste.

Nune'e, iha primeiru anu ka tinan dahuluk, hosi tinan lima mandatu Governu AMP nian, implementa ona reformas estruturais, iha âmbito Reforma Jestaun Estadu no hametin liután Seguransa no Estabilidade Nasionál, ne'ebé iha reflexus signifkativus ka rezultadus di'ak tebes ba kreximentu ekonómiku no dezvoltamentu ba longu-prazu.

Wainhira koalia kona-ba prioridades prinsipasi ne'ebé define ba tinan 2008 hanesan : Orden públika no seguransa; protesauñ sosiál no solidariedade; resposta ba nesidades jovens sira nia; kirasaun empregu no aumenta rendimentus; hadi'a presatasaun servisuñ sosiális; no Governu ida ne'ebé transparente no efetivu - it akonsege to'o ohin loron, hetan rezultadus fundamentais, atu bele lori Páiz ne'e ba dalan dezentovimentu, hodi nune'e ha'u bele destaka ka salienta kona-ba:

- **Rekuperá ka hetan fali ona konfiansa Povu nian** ba Instituisoens Estadu;
- **Hetan fali konfiansa hosi Komuidade Internasionál**, ne'ebé hakfodak tebes ho forma oinsá Governu hasoru problemas ne'ebé mósu iha fulan Fevereiru, hodi estabelese fali orden públika no konstitusionál aumezmu tempu la hamenus implementasaun ba nia programas, hanesan projetus kooperasaun foun ne'ebé halo tan;
- **Konfiansa hosi investidores estranjeirus** ne'ebé mai apresenta tan propostas investimentu iha ita nia Rain;
- **Konfiansa hosi setór privadu** timor nian ne'ebé agora bele hetan klima seguransa boot liu no mós apoiu husi Governu, ho prosedimentus ne'ebé di'ak liu, sistema aprovizionamentu lais liu nian no ezekusaun orsamentál ne'ebé di'ak liu nian;
- **Reforsu ba investimentu públiku** iha projetus prestasaun servisuñ ba populasaun.

Depoizde halo buat hirak ne'e hotu, la iha tan ona razaun atu labele hahú ho medidas foun ba dezentovimentu iha longu-prazu, ne'ebé sei sai baze ba projetu ne'ebé boot tebes iha tinan 2009, mak: **Tinan Infra-Estruturas**, tanba ne'e ita tenke prekavé katak prepara kedas ona-an hodi hasoru impaktus negativus hosi krize mundiál, haree hosi aumentu presus produtus esensiais no mós ba krize alimentár.

Dezígniu ka intensaun boot ida ne'e mak justifika loloos kedas levantamentu hosi **Fundu Petróleu**, ne'ebé aas liu 3% Rendimentu Sustentável, tuir rekizitus ka kondisoens ne'ebé lei ezije. Nune'e, tuir pájina 20 relatóriu Komisaun Ekonomia, Finansas no Anti-Korrupsaun nian rasik, iha mós hanoin ne'ebé hanesan loloos ho opsaun Governu nian, ne'ebé Komisaun ne'e rasik halo ona favór atu explika – tanba ne'e mak ami agradese tebes – kona-ba razaun tansá halo lavantamentu ne'e. Agora ha'u hakarak sita ka temi Komisaun C ne'e nia liafuan ne'ebé dehan:

*«Presiza ita hatene sa'ida mak signifika expresaun interese ba longu-prazu. Ami entende katak interese ba longu-prazu la'ós interese ekonómiku ka finanseiru mesak de'it. Interese ida ne'e, ne'ebé Lei enunsia ka batudu ona, tenke iha interpretaun ne'ebé boot no luan liután, tanba kona mós ba interese sosiál ne'ebé presiza meus finanseirus atu hetan fins*

*estabilizasaun sosiál konjunturál. ALoka meus finanseirus substansiais ba opsoens politikas hodi konkretiza intereses sosiais relevantes ne'ebé bele garante estabilidade sosiál, ne'e mós hanesan meu ida atu asegura intereses ba longu-prazu, ho benefisiu ba jerasoens agora nian no mós ba aban-bain rua».*

Motivus ka razoens no interesse Timór-Leste nian ba longu-prazu klaru tebes :

1. **Medidas kona-ba justisa sosiál**, ne'ebé konkretiza liuhosi verbas ka osan ne'ebé aloka ba idozus, Dezlokadus, Kombatentes Libertasaun Nasionál, Petisionáriu no grupus vulneráveis seluktán, kontribui ba seguransa no estabilidade ne'ebé boot liu hodi promove Paíz nuudár fatin atrativu ka ne'ebé di'ak liu ba investimentu públiku no privadu, hodi kria mós empregu. Hosi parte seluk, pagamentu ba benefisiáriu hirak ne'e sei ba ikas fali ba sira nia famílias no ba sira nia estabilidade rasik, hodi nune'e bele kontribui ba dezvoltamentu komérsiu no empresas kiikoan sira, ho mós ba alimentasaun, saúde no edukasaun, ne'ebé sei lori bá to'o dezvoltamentu kapitál umanu iha Paíz;
2. **Investimentu no dezvoltamentu Kapitál Umanu**, ne'ebé konkretiza ho Orsamentu 2008 agora reforsa liután no fundamentál ba dezvoltamentu Paíz ba longu-prazu. Ezemplus balu mak hanesan:
  - Implementasaun Política Nasionál ba Edukasaun, tinan 9 eskolaridade obrigatoria i gratuita;
  - Implementasaun kursu baixarelatu ba 300 profesores no simu diploma ekivalênsia ba 285 profesores hosi ensinu báziku;
  - Implementasaun kursu intensivus formasaun ba 3.000 professores ensinu pré-sekundáriu no sekundáriu;
  - Fó 100 Bolsas Estudu tinatinan, iha áreas formasaun prioritária ba dezvoltamentu Paíz, aumenta tan Bolsa Estudu ba Funsionáriu Públiku atu hetan tan kualifikasoens;
  - Realizasaun 2.099 benefisiáriu ba kursu formasaun profisionál iha primeiru semestre ne'ebé sei duplika molok tinan remata;
3. **Investimentu públiku iha projetus infra-estruturas**, hanesan motór prinsipál kria saun empregu. Ezemplus balu ne'ebé bele halo iha 2008:
  - Projetus infra-estruturas (estradas, pontes, kontrolu ba mota) ne'ebé agora halo hela prosesu aprovizionamentu i sei kria 22.300 postus trabalhu;

- Projetu konstrusaun Sentrá Elétrika la'ós de'it sei rezolve ba longu-prazu problema produsaun no distribuisaun eletrisidade ba Paíz tomak, maibé sei promove dezvoltimentu rurál no ambientál (enkuantu hamenus daudaun taa-ai) – hodi kria postus trabalhu ka fó servisu ba ema 30.000;
- Projetus infra-estruturas produsaun enerjia alternativa sei kria serkade 40 mil postus trabalhu, halo parseria ho investimentus estranjeirus;
- Projetus irrigasaun, ligadus ho ekipamentu ne'ebé di'ak liu ba egrikultores, hatama sementes modernas ka foun liu nian, no mós konstrusaun sentrus apoiu no menutensaun, sei aumenta produsaun agrikola, garante seguransa alimentár, permite dezvoltolve merkadu internu, rejionál no internasionál, nune'e mós kriaun empregu;
- Reforsu ba programa “cash for work” mai aumenta tan númeru postus trabalhu, ne'ebe' iha primeiru semestre to'o ona 24.474 postus;
- Halo ró-ahi foun rua ba prevensaun peska ilegál, aleinde atu proteje ita nia riku-soin agora nian no jerasoens aban-bainrua nian, hanesan mós dalan ida atu kria empregu ba timór-oan sira. Kontratu ne'ebé halo ho Xina, tanba sira apresenta kondisoens ne'ebé di'ak liu, purezemplu, haruka ita nia jovens no militares sira atu ba simu formasaun kona-ba konstrusaun, manutensaun ba aban-bainrua no manobrametus ró-ahi – tanba ne'e mai sei konstroe mós doka seka ka maran ida, atu aban-bainrua reparasoens ka hadi'a ró bele halo hotu iha Timór-Leste;
- Projetu konstrusaun Silus Armazenamentu, hanesan medida esensial ida ba seguransa alimentár ba longu-prazu, aleinde permite halo armazenamentu kuantidade boot produsus alimentares, sei kontribui ba dezvoltimentu indústrias prosesamentu – atu trafnsorma produsus hanesan ai-fuan, batar, fehuk-mídar, bani-been no produsus ne'ebé uza hanesan adubus, hodi diminui dependênsia ba beins ne'ebé tenke importa hosi estranjeiru.

4. Finalmente, **Fundu Estabilizasaun Ekonómika** ne'ebé hanesan medida preventiva ida ho karáter provizóriu atu rezolve problema konkretu kona-ba krize mundiál.

Sua Exselênsia Prezidente Parlamentu Nasionál  
Distintus Deputadus

Fundu ida ne'e hatama iha Orsamentu, iha kategoria Beins i Servisus, hanesan mekanizmu prevensaun kontra adversidades ka difikuldades mai hosi li'ur . Tanba ne'e duni maka labele konfunde ho despezas Minsitérius sira nian ne'ebé la hatama iha fundu kontinjênsia – tanba ida ne'e hanesan **medida temporária i la'ós hanesan prátika orsamentál.**

Verba ida ne'e sei uza ba kazu ida-ida, nesesidade ida-ida, hodi proteje liu maun-alin sira ne'ebé kiak liu iha Rai ne'e no garante Programa Governu, atu labele ipoteka ka penhór fali dezentvolvimentu nasional.

Karik, la la'o tuir previzoens hotu-hotu, mak konjuntura ka situasaun difísil bele muda, entaun verba ka osan ida ne'e sei la utiliza nein uitoan. Maibé, karik senáriu ne'ebé nakukun liután mak mosu, ita prepara ona atu atua, no atuaun ida ne'e sei justa, transparente, hodi garante ba Parlamentu Nasionál kondisoens tomak atu sira bele fiskaliza verba ne'ebé koloka iha Fundu ida ne'e.

Ha'u hakotu, ho konkluzau katak aprovasaun Orsamentu Jerál Estadu nian hanesan fundu fundamentál tebes ba dezentvolvimentu Paíz iha longu-prazu: Se la iha rekursus umanus kapazes sei la iha instituisoens ida mak bele funsiona; se la iha investimentu públiku no privadu sei la iha dezentvolvimentu infra-estruturas; se la iha obras infra-estruturas sei la iha kriaun mepregu i se la iha kriaun mepregu sei la iha kbiit sosa sasán atu timór-oan ida-ida bele moris; la iha hahán, saúde, no lazér ka tempu atu diverte, ita sei hahú fali ho violênsia boot no instabilidade iha Paíz.

Di'ak liu prevene duke moras-ona, mak foin buka ai-moruk!

Obrigadu Barak!